

UPUTSTVO ZA PACIJENTA

ASKA pro 100 mg želučanootporne tablete acetilsalicilna kiselina

Pažljivo pročitajte cijelo ovo uputstvo prije nego počnete uzimati ovaj lijek jer sadrži Vama važne podatke. Uvijek uzmite ovaj lijek tačno onako kako je opisano u ovom uputstvu ili kako Vam je rekao ljekar ili farmaceut.

- Sačuvajte ovu uputu. Možda ćete je trebati ponovno pročitati.
- Ako trebate dodatne informacije ili savjet, obratite se svom farmaceutu.
- Ako primijetite bilo koju nuspojavu, potrebno je obavijestiti ljekara ili farmaceuta. To uključuje i svaku moguću nuspojavu koja nije navedena u ovom uputstvu. Pogledajte dio 4.
- Obavezno se obratite ljekaru ako se ne osjećate bolje ili ako se osjećate lošije.

Što se nalazi u ovom uputstvu:

1. Što je ASKA pro i za što se koristi
2. Što morate znati prije nego počnete uzimati ASKA pro
3. Kako uzimati ASKA pro
4. Moguće nuspojave
5. Kako čuvati ASKA pro
6. Dodatne informacije

1. Što je ASKA pro i za šta se koristi

ASKA pro sadrži acetilsalicilatnu kiselinu, koja, kad se primjenjuje u niskim dozama, pripada skupini lijekova pod nazivom antitrombocitni lijekovi. Trombociti su sitne krvne stanice zaslužne za zgrušavanje krvi i sudjeluju u stvaranju ugrušaka. Krvni ugrušak koji se stvori u arteriji zaustavlja krvotok i prekida opskrbu kisikom. Kad se to dogodi u srcu, može prouzročiti srčani udar ili bol u prsištu, a u mozgu može prouzročiti moždani udar.

ASKA pro se koristi za sprječavanje srčanog i moždanog udara u bolesnika koji su već preboljeli srčani, odnosno moždani udar. Također se primjenjuje za sprječavanje stvaranja krvnih ugrušaka nakon određenih vrsta operacija na krvnim žilama kako bi se krvne žile proširile ili postale prohodne.

Ovaj lijek nije namijenjen za ublažavanje boli niti za snižavanje povišene tjelesne temperature kod prehlade ili gripe.

Ovaj se lijek ne preporučuje u hitnim slučajevima. Lijek se može primjenjivati samo za preventivno liječenje.

ASKA pro namijenjena je dugotrajnom liječenju. Prije prvog uzimanja ovog lijeka potrebno je potražiti savjet svog ljekara.

2. Šta morate znati prije nego počnete uzimati ASKA pro

Nemojte uzimati ASKA pro:

- ako ste alergični na acetilsalicilatnu kiselinu, druge salicilate (određene lijekove protiv bolova) ili neki drugi sastojak ovog lijeka (naveden u dijelu 6.)
- ako ste, nakon uzimanja salicilata ili nesteroidnih protuupalnih lijekova, imali astmatski napad ili oticanje nekog dijela tijela, npr. lica, usana, grla ili jezika (angioedem)
- ako imate vrijed (čir) želuca ili dvanaesnika (početni dio tankog crijeva)
- ako ste ikada imali tegobe s poremećenim zgrušavanjem krvi ili ako ste skloni krvarenju
- ako imate teško zatajenje funkcije bubrega ili jetre
- ako imate teško zatajivanje srca

Odobreno
ALMBIH
3.11.2025.

- ako uzimate 15 mg ili više metotreksata tjedno (lijek za liječenje različitih vrsta tumora, psorijaze i reumatoidnog artritisa, vidjeti dio *Drugi lijekovi i ASKA pro*)
- ako ste u posljednjem tromjesečju trudnoće (vidjeti dio *Trudnoća i dojenje*)
- ako ste mlađi od 16 godina (vidjeti dio *Djeca i adolescenti*).

Upozorenja i mjere opreza

Obratite se svom ljekaru ili farmaceutu prije nego uzmete ASKA pro:

- ako ste alergični (preosjetljivi) na druge lijekove protiv boli, nesteroidne protuupalne lijekove ili lijekove za liječenje reumatskih bolesti i u slučaju drugih alergija
- ako ste ikada imali vrijed (čir, ulkus) u probavnom sistemu (želucu ili na dvanaesniku). Prestanite uzimati ovaj lijek odmah i obavijestite ljekara ako dođe do krvarenja ili čira u želucu ili crijevima. Znakovi su krvarenje na usta, krv u stolici i crno obojena stolica.
- ako istodobno uzimate druge lijekove protiv zgrušavanja krvi (antikoagulanse)
- ako imate oštećenu funkciju bubrega ili poremećaj cirkulacije srca i krvnih žila (npr. bolesti krvnih žila bubrega, zatajivanje srca, veliki operativni zahvat ili velika krvarenja) jer acetilsalicilna kiselina može dodatno povećati rizik od oštećenja bubrega
- ako imate blago i umjereno oštećenje funkcije jetre
- ako imate težak nedostatak enzima glukoza-6-fosfat dehidrogenaze (G6PD) jer acetilsalicilna kiselina može izazvati hemolizu ili hemolitičku anemiju
- ako uzimate ibuprofen protiv boli
- ako imate astmu, peludnu hunjavicu, polipe u nosu ili hroničnu opstruktivnu bolest pluća jer acetilsalicilna kiselina može u Vas izazvati bronhospazam i astmatski napad ili druge alergijske reakcije
- ako imate planiran operativni zahvat i nakon njega (uključujući i manje operacije kao npr. vađenje zuba), može se javiti povećana sklonost krvarenju. Obavijestite svog ljekara ili stomatologa da uzimate ovaj lijek.
- ako imate jake menstruacije (menoragiju)
- ako imate upalnu bolest zglobova (giht)
- ako ste stariji od 65 godina jer možete biti osjetljiviji na nuspojave nesteroidnih protuupalnih lijekova, uključujući i acetilsalicilatnu kiselinu
- ako uzimate druge lijekove (vidjeti dio *Drugi lijekovi i ASKA pro*).

Lijek nije namijenjen za ublažavanje boli niti za snižavanje povišene tjelesne temperature kod prehlade ili gripe.

Ovaj lijek može izazvati suženje dišnih puteva i astmatske napade ili druge reakcije preosjetljivosti. Primjenu lijeka potrebno je prekinuti kod pojave bilo kojeg znaka preosjetljivosti (npr. osip, svrbež, oticanje, poteškoće s disanjem i slično).

Postoji povećani rizik od krvarenja, osobito tokom i nakon operativnih zahvata (čak i kod manjih zahvata, npr. stomatoloških zahvata). Također je potreban oprez pri primjeni ovog lijeka prije operativnih zahvata i ako uzimate lijekove koji utječu na zgrušavanje krvi ili lijekove koji razgrađuju krvne ugruške, odnosno lijekove koji utječu na krvarenje (vidjeti dio *Drugi lijekovi i ASKA pro*).

U slučaju da ste se lakše ozlijedili (npr. modrice) ili porezali (npr. pri obavljanju aktivnosti iz svakodnevnog života), krvarenje iz rana može potrajati duže nego što je uobičajeno. To je zbog utjecaja ovog lijeka na zgrušavanje krvi. Manje posjekotine i ozljede (npr. kod brijanja) obično nisu značajne.

Ukoliko primijetite neobične znakove krvarenja (npr. modrice, neuobičajeno mjesto ili trajanje krvarenja), trebate obavijestiti svog ljekara.

Djeca i adolescenti

Postoji moguća povezanost između primjene ovog lijeka i pojave Reyeva sindroma u djece. Reyev sindrom je vrlo rijetka, ali moguće životno ugrožavajuća bolest koja zahtjeva hitnu medicinsku skrb. Stoga se ovaj lijek ne smije davati djeci mlađoj od 16 godina, osim po preporuci ljekara.

Ako se nešto od gore navedenog odnosi na Vas ili, ako niste sigurni, javite se svom ljekaru ili farmaceutu.

Drugi lijekovi i ASKA pro

Obavijestite svog ljekara ako uzimate, nedavno ste uzeli ili biste mogli uzeti bilo koje druge lijekove.

**Odobreno
ALMBIH
3.11.2025.**

Ako istodobno uzimate ovaj lijek i druge lijekove, može doći do njihovog međudjelovanja. Ovaj lijek može pojačati učinak nekih lijekova, stoga pripazite ako uzimate:

- lijekove za liječenje karcinoma i reumatoidnog artritisa (metotreksat)
- lijekove za ublažavanje boli i upala (npr. sistemski kortikosteroidi i drugi protuupalni lijekovi, uključujući nesteroidne protuupalne lijekove, npr. ibuprofen) zbog povećanog rizika od nastanka čira i krvarenja u probavnom sistemu
- lijekove koji utječu na zgrušavanje krvi (npr. varfarin) ili lijekove koji razgrađuju krvne ugruške. Budući da se istodobnim uzimanjem povećava rizik od krvarenja, obratite pažnju na znakove potkožnog krvarenja, kao što su npr. modrice.
- lijekove za liječenje depresije zbog povećanog rizika od nastanka čira i krvarenja u probavnom sistemu (npr. selektivni inhibitori ponovne pohrane serotonina, npr. citalopram, escitalopram, fluoksetin, fluvoksamin, paroksetin, sertralin)
- lijekove koji se koriste za liječenje bolesti srca (digoksin)
- lijekove za liječenje šećerne bolesti (tzv. antidijabetici, npr. inzulin, sulfonilureja) jer je pad vrijednosti šećera u krvi izraženiji nego inače
- lijekove za liječenje Addisonove bolesti (sistemski glukokortikoidi, osim hidrokortizona)
- lijekove za liječenje epilepsije (npr. valproatna kiselina)
- alkohol.

Ako uzimate sljedeće lijekove, ASKA pro može smanjiti njihovu učinkovitost:

- lijekovi za sniženje povišenog krvnog pritiska (diuretici i ACE inhibitori)
- lijekovi koji povećavaju izlučivanje mokraćne kiseline i koriste za liječenje gihta (npr. probenecid, benzbromaron).

Metamizol (lijek koji se koristi za ublažavanje boli i snižavanje vrućice) može smanjiti učinak acetilsalicilne kiseline na agregaciju trombocita (krvne stanice koje se sljepljuju i stvaraju krvni ugrušak), ako se uzima istodobno. Stoga ovu kombinaciju treba primjenjivati s oprezom u bolesnika koji uzimaju nisku dozu acetilsalicilne kiseline za zaštitu srca.

ASKA pro s hranom, pićem i alkoholom

Ovaj lijek ne smijete uzimati s alkoholom jer se zbog aditivnog učinka alkoholnih pića povećava opasnost od krvarenja u probavnom sistemu i produžuje vrijeme krvarenja.

Trudnoća i dojenje

Ako ste trudni ili dojite, mislite da biste mogli biti trudni ili planirate imati dijete, obratite se svom ljekaru ili farmaceutu za savjet prije nego uzmete ovaj lijek.

Trudnoća

Uzimanje lijeka potrebno je izbjegavati u žena koje planiraju trudnoću ili su trudne.

Ovaj lijek ne smijete uzimati tokom posljednjeg tromjesečja trudnoće jer može uzrokovati ozbiljnu štetu Vama ili Vašem nerođenom djetetu.

Primjena ovog lijeka tokom prvog i drugog tromjesečja trudnoće dozvoljena je samo ako je izričito potrebno na preporuku ljekara.

Dojenje

Ovaj lijek u malim količinama prelazi u majčino mlijeko.

O primjeni ovog lijeka tokom dojenja posavjetujte se s ljekarom. Kod redovnog uzimanja ili u visokim dozama, potrebno je prekinuti dojenje.

Upravljanje vozilima i mašinama

Nema podataka o utjecaju lijeka ASKA pro na sposobnost upravljanja motornim vozilima i rada sa mašinama. Ipak, mora se uzeti u obzir, da se može pojaviti omaglica u slučaju predoziranja.

ASKA pro tablete sadrže natrij

Ovaj lijek sadrži manje od 1 mmol (23 mg) natrija po tableti, tj. zanemarive količine natrija.

3. Kako uzimati ASKA pro

Uvijek uzmite ovaj lijek tačno onako kako je opisano u ovom uputstvu ili kako Vam je rekao ljekar ili farmaceut. Provjerite s ljekarom ili farmaceutom ako niste sigurni.

Prije prvog uzimanja ovog lijeka, obratite se svom ljekaru.

Način primjene

Kroz usta.

Tablete treba uzimati prije jela s dovoljnom količinom tekućine (1/2 čaše vode).

Tablete imaju želučanootpornu ovojnicu koja sprječava nadraživanje sluznice želuca. Tablete se ne smiju drobiti, lomiti niti žvakati.

Doziranje

Odrasli

Preporučena doza je 1 tableta dnevno.

Ne smijete uzimati više od preporučene doze.

Stariji od 65 godina

Ovaj lijek se mora koristiti s oprezom zbog mogućih dodatnih poremećaja.

Bolesnici sa smanjenom funkcijom jetre ili bubrega ili s problemima s cirkulacijom

Smanjenje doze ili produženi intervali doziranja preporučuju se za bolesnike:

- s blagim ili umjerenim smanjenjem funkcije jetre ili bubrega
- s problemima s cirkulacijom, poput zatajivanja srca i obilnog krvarenja.

Primjena u djece i adolescenata

Ovaj lijek ne smije se davati djeci i adolescentima mlađima od 16 godina, osim ako to nije propisao ljekar (vidjeti dio *Upozorenja i mjere opreza*).

Trajanje liječenja

Ovaj lijek namijenjen je dugotrajnom liječenju.

O trajanju liječenja, prilagodbi doze lijeka ili prekidu liječenja posavjetujte se s ljekarom.

Ako uzmete više lijeka ASKA pro nego što ste trebali

Ako Vi (ili netko drugi) uzmete više lijeka nego što ste trebali, odmah obavijestite ljekara ili otidite u najbližu hitnu službu. Pokažite ljekaru preostali lijek, ovu uputu ili praznu kutiju. Ljekar će odlučiti o mjerama koje je potrebno provesti ovisno o težini predoziranja.

Simptomi umjerenog predoziranja mogu uključivati omaglicu, vrtoglavicu, zujanje u ušima, gluhoću, znojenje, mučninu, povraćanje, glavobolju i smetenost.

Teško predoziranje (moguće po život opasno) može dovesti do ubrzanog disanja (hiperventilacija), vrućice, prekomjernog znojenja, dehidracije (osjećaj žeđi), nemira, napada, halucinacija (doživljaji putem vida, sluha, mirisa koji nisu stvarni), niskog šećera u krvi, kome i šoka (kolaps cirkulacije) te zastoja disanja.

Ako ste zaboravili uzeti ASKA pro

Uzmite redovnu dozu lijeka čim se sjetite. Nemojte uzeti dvostruku dozu kako biste nadoknadili zaboravljenu dozu. Nastavite uzimati lijek prema redovnom rasporedu.

U slučaju bilo kakvih pitanja u vezi s primjenom ovog lijeka, obratite se ljekaru ili farmaceutu.

4. Moguće nuspojave

Kao i svi lijekovi, ovaj lijek može uzrokovati nuspojave iako se one neće javiti kod svakoga.

Prestanite uzimati ovaj lijek i odmah se javite svom ljekaru ili u najbližu zdravstvenu ustanovu ako primijetite bilo koji od sljedećih simptoma (nepoznata učestalost - ne može se odrediti iz dostupnih podataka):

**Odobreno
ALMBIH
3.11.2025.**

- oticanje lica, usana, očnih kapaka i/ili jezika, poteškoće s disanjem (simptomi teške alergijske reakcije koja se naziva angioedem)
- navala crvenila, svrbež, mučnina, osjećaj gušenja, ubrzani otkucaji srca, pad krvnog pritiska, vrtoglavica, piskanje u plućima (simptomi anafilaktičke reakcije i mogućeg anafilaktičkog šoka)
- iznenadni zastoj funkcije srca i pluća u slučaju teških alergijskih reakcija
- nagla glavobolja, mučnina, povraćanje, nemogućnost pokretanja, gubitak svijesti (simptomi krvarenja u mozgu ili lobanji).

Nepoznata učestalost (ne može se procijeniti iz dostupnih podataka):

- anemija uzrokovana krvarenjem
- anemija zbog nedostatka željeza
- raspadanje crvenih krvnih stanica (hemoliza) i hemolitička anemija u bolesnika s teškim oblicima nedostatka enzima glukoza-6-fosfat dehidrogenaze (G6PD)
- reakcije preosjetljivosti na lijek
- omaglica
- zvonjava u ušima
- krvarenje
- krvarenje u slučaju operativnog zahvata
- podljevi (modrice)
- krvarenje iz nosa
- pogoršanje astme zbog uzimanja lijekova protiv bolova (sindrom analgetske astme)
- curenje iz nosa, začepljenost nosa
- loša probava
- bol u probavnom sistemu i truhu
- krvarenje desni
- upala probavnog sustava
- vrijed (čir) u probavnom sistemu
- krvarenje u probavnom sistemu
- puknuće vrijeda (čira) u probavnom sistemu
- oštećenje jetre (prolazno)
- povećane vrijednosti jetrenih enzima transaminaza
- osip
- koprivnjača
- svrbež
- krvarenje iz mokraćnih ili spolnih organa
- oštećenje funkcije bubrega
- akutno zatajenje bubrega.

Prijavljivanje neželjenih efekata

U slučaju bilo kakvih neželjenih reakcija nakon primjene lijeka, potrebno je obavijestiti Vašeg ljekara ili farmaceuta. Ovo podrazumijeva sve moguće neželjene reakcije koje nisu navedene u ovom uputstvu o lijeku, kao i one koje jesu.

Prijavljivanjem nuspojava možete pridonijeti u procjeni sigurnosti ovog lijeka.

5. Kako čuvati ASKA pro

Lijek čuvajte izvan pogleda i dohvata djece.

Lijek čuvajte na temperaturi do 25°C. Ne čuvati u hladnjaku.

Rok trajanja:

Četiri (4) godine od datuma proizvodnje.

Ovaj lijek se ne smije upotrijebiti nakon isteka roka valjanosti navedenog na pakiranju. Rok valjanosti odnosi se na zadnji dan navedenog mjeseca.

**Odobreno
ALMBIH
3.11.2025.**

Nikada nemojte nikakve lijekove baciti u otpadne vode ili kućni otpad. Pitajte svog farmaceuta kako baciti lijekove koje više ne koristite. Ove će mjere pomoći u očuvanju okoliša.

6. Dodatne informacije

Šta ASKA pro sadrži

- Aktivna tvar je acetilsalicilna kiselina.
- Jedna želučanootporna tableta sadrži 100 mg acetilsalicilne kiseline.
- Pomoćne tvari su:
- Tabletna jezgra: celuloza, prah; škrob, prethodno geliran.
- Ovojnica: metakrilna kiselina kopolimer tip C; talk; makrogol 8000; silicijev dioksid, koloidni, bezvodni; natrijev hidrogenkarbonat; natrijev laurilsulfat.

Kako ASKA pro izgleda i sadržaj pakovanja

ASKA pro 100 mg želučanootporna tableta je bijela, bikonveksna, okrugla obložena tableta, promjera 7,2 30 (2x15) tableta u PVC//Al blisteru, u kutiji

Režim izdavanja lijeka

Lijek se ne izdaje na ljekarski recept.

Proizvođač

FARMAVITA d.o.o. Sarajevo
Igmanska 5a, 71320 Vogošća, Bosna i Hercegovina

Proizvođač gotovog lijeka

FARMAVITA d.o.o. Sarajevo
Igmanska 5a, 71320 Vogošća, Bosna i Hercegovina

Nositelj dozvole za stavljanje lijeka u promet

FARMAVITA d.o.o. Sarajevo
Igmanska 5a, 71320 Vogošća, Bosna i Hercegovina

Broj i datum rješenja o dozvoli za stavljanje lijeka u promet:

04-07.3-1-4622/25 od 03.11.2025. godine

**Odobreno
ALMBIH
3.11.2025.**